



Pancho Wever:
CONSEHERO
DI S.V.
BRAZIL JRS.

Warero tabata di bishita na cas di Fransisco Wever, mehor conoci como Pancho, kende ta un persona hopi conosi aki na Aruba den e mundo deportivo, principalmente den e barrio di Brasil. Pancho ta residencia na Rooi Master 22, na unda e tin su Mini Snack Bar "Little Lupita" unda e habitante nan di Rooi Master por pasa un rato agradable divertiendo nan mes cu un bon plato of cu diferente wega nan cu tin disponible, y na unda WARERO por a hiba un conversacion cu Pancho encuanto di e Feria cu Brasil Jrs. ta bay organiza den e luna di July, y tambe Pancho a trece e problema nan cu Brasil Jrs., ta hanja nan mes confronta cu ne. Brasil Jrs. tin un bestuur cu ta consisti di Sr. J. Harms (press) C. Marchena (sec.) y demas miembro nan ta Srs. D. Ras: J. Vos. B. Casuela. J.P. Irausquin, y H. Pieternella. E bestuur aki Pancho ta Consehero actualmente.

Antes Pancho tabata presidente di Jong Brasil, Arantex. y R.C.S. Desde fundacion di Brasil Jrs. Mei 18, 1958 Pancho a ocupa e puesto di Presidente. E club aki pa basta tempo, aparte di football Brasil Jrs. ta practica Baseball, Softball, volleyball, y pa varios año ta organiza fiesta nan di año di La Reina, y tambe deramento di gay, cuan ta e fiesta di San Juan.

Brasil Jrs. tin un total di 85 miembros inscribi na bond di cual algun di nan ta activo ainda, miembro sostenedor tambe tin inscribi den buki, pero yudansa financiero ta laga hopi di desea.

Actualmente Brasil Jrs. ta haya nan confronta cu un problema basta serio, y e posibilidad nan tey cu nan lo perde e tereno cu nan ta utiliza pa eherce deporte, debi cu doño di e tereno a pidi su tereno bek. Brasil Jrs. tin nada menos cu 19 año ta hasi uso di e tereno aki y e muchanan di school den vecindario tambe ta hasi uso di e tereno aki, esey ta trece cune cu Brasil Jrs. no tin tereno pa practica deporte y e mucha nan di school tampoco.

Brasil Jrs. tin un feria planea pa luna di July pa asina nan por recauda fondo pa por jega na un tereno nobo. Tin un tereno cu nan por hasi bon uso di dje, pero esaki ta pertenece na Buurt Centrum Brasil.

Segun Pancho a declara e por a lesa den courant cu tin un problema algun caminda, cu e proyecto aki no a cuminsa ainda, y Pancho tin intencion di bay papia cu Buurt Centrum si por cuminsa sikiera cu e tereno di football debi cu esaki ta algo cu mester cu urgencia. Pancho tambe tabata pertenece na e directiva di Centro di Barrio, pero pa motibo nan personal e no por a cumpli debidamente, pero tin intencion di afilia Brasil Jrs hunto cu Centro di

Barrio, y cual lo ta un bon idea debi cu Pancho ta consehero di Brasil Jrs. e por duna un bon ajudo pa cu e nesecidad nan di football, baseball, etc. y ta nos tur cu ta pertenece na e barrio di Brasil mester pone un push tras di e asunto di Centro di Barrio, nos mester traha uni aunke cu e palabra aki ta wordo usa hopi na mesa pero den praktijk e no ta worde eherce.

Segun Pancho a sigui declara cu te ainda e no ta mira un borchu cual ta indica na unda e Centro di Barrio lo bini. Brasil Jrs. a jega di organiza un of dos ves pa año fiesta bao di overdekte speelplaats pa por cubri nan gastonan, cual ta hopi debi cu den e miembrecia nan di Brasil Jrs. tin hopi joven nan cu ta bay school ainda, y mester yuda nan pa cumpra sapato di bala, y tambe mester cubri gasto nan di transportacion, mantenimiento di e tereno, cumpramento di bala, tur esaki ta hopi gasto.

Pancho ta spera cu henter e pueblo di Aruba y esun di Brasil en principal lo bishita e feria aki pa asina yuda cu un bon causa, cual ta cu Brasil Jrs. por haya nan tereno pa asina nan y tambe e mucha nan di school por sigui practica deporte. Ultimamente bo por tende e proverbio cu ta bisa "MAS DEPORTE MENOS VICIO" pero si no tin e facilidad nan, con esey por ta possible?

Te asina leeuw e conversacion cu WARERO tabata tin cu Sr. Pancho Wever.

S.V. BRAZIL JRS.

Den un esfuerzo pa por jega na fondos pa asina por juda crea mas facilidadnan deportivo, S.V. Brazil Jrs. a pidi permiso na Autoridadnan competente pa por organiza un feria riba speelplaats di Christus-Koningschool na Brazil.

Den caso cu permiso wordu obteni, e feria aki lo ser teni durante tres week-ends y lo ta riba e siguiente fechanan: Juli 22, 23, 24, 29, 30, 31 Augustus 5, 6, y 7, 1977.

E feria cu lo carga e number di SUPER-FERIA BRAZIL, lo tin un total di 25 tentnan. Diariamente lo tin oportunidad pa baila. Un total di ocho candidata lo competi pa e titulo di Reina di Super-Feria Brazil.

Siendo cu tur eventonan organiza den Brazil te awor a resulta di tabata exitonan rotundo, ta di spera cu e feria aki tambe lo por conta cu e apoyo y respaldo di henter e comunidad Arubano y muy en especial di e pueblo di Brazil.

Keda pendiente di informacion adicional en cuanto e SUPER-FERIA BRAZIL.

